

► *Discurso conmovedor di Edwin Abath den despedida di Watty Vos na Cas di Partido AVP*

Danki pa haci nos orguyoso di ta Arubiano, specialmente di ta jiu di Playa Pabao

ORANJESTAD - Un di e discursonan na Cas di Partido na despedida di Watty Vos, cu a causa mas conmocion, tabata di Edwin Abath. Edwin Abath a conmové tur hende, e un discurso elocuente y sincero manera Watty Vos a siné y cu acaparará atencion di tur hende.

Bon Dia Aruba ta citá parti di e discurso aki.

"Awe nos a bin hunto atrobe manera un famia, sinembargo awe pa despedi físicamente di nos Watty. Palabranan ta keda corto ora di papia di Watty, un persona clase aparte, di un calidad humano incomparable. Un homber sincero, fiel na su principio y propositonan.

Pa Watty nada tabata imposibel, tur cos semper tabatin un solucion. Si tabata tin un bentana di oportunidad, pa chikito y scondi cu esaki tabata, e tabata sa di hayé.

Kizas grandeza ta locual cu a caracterizá Watty mas cu tur cos. Un característica cu cual e tabata sa di di gana hasta su adversarionan na su banda. Watty tabata un persona di "concertacion, nunca di division ni di polarizacion".

Watty semper a duna crédito n'e opinion of ideanan di esun cu merecè sin mira promé ta kende e ta of ta kiko e tabata representá. T'e enfoque humano aki, combiná cu un charisma y calidad humano incomparable cu a haci e sem-

per stimá pa tur cu a conocé.

Watty di semper tabata un defensor, locual tambe el'a combertí den su carrera; semper saliendo na defensa di esnan rechazá, di esnan mas debil of cu mas mester di sostén y guía den nos comunidad.

Watty tabata un "Señor Político", un mentor, un maestro, kende atrabes di su siñanzanan a sabi di inspirá, iluminá y forma hopi di nos, como hoben, pa kere den e propositonan mas noble cu ta existi den política: "E espíritu di servicio" y "política no como un fin, sino como e medio pa logra cosnan grandi pa bo comunidad". Cada momento pasa den su compañía tabata un privilegio, un honor inmenso, un oportunidad inbalarabel pa siña y comprendé bida y su retonan. Y asina ami a crece na man di mi maestro Watty.

Watty a toca bida di hopi cu a conocé. E ta laga un espacio bashí den nos existencia, sinembargo nos curazon ta contené un simiña, un simiña cu promé cu su partida el'a laga planta den nos cada un pa nos sigui recordé. Un simiña di amor, di amistad, di comprension y di paz. Awor ta na nos cada un pa cultivá e simiña aki y compartí e frutanan cu nos próhimo.

Kizas e fruta di mas bunita lo bira ora cu den su memoria nos dedicá mas na un aspecto

infinitamente ligá na nos bida aki na mundo, pero cu hopi di nos sa negligé, esta nos spiritualidad. Tabata Watty su deseo ferviente pa nos a pone mas acénto riba spiritualidad den nos bida diario, den nos propositonan político y den nos trato di un pa otro. Watty a duna e ehempel bibo ora cu n'e buelta final di su bida el'a renobá su fé inmensamente den nos Señor Hesucristo y a transformá su mes den portavoz di su palabra.

Watty tabata un homber di hopi dimension y profundidad. Un homber di un experiencia indiscutible. Suzapatonan a cana hopi caminda. Amigonan e zapatonan cu Watty ta laga atras ta imposibel pa yena, pues ningun di nos mester tin e mínimo pretencion pa cana den nan. Ma' locual nos mester haci si ta pa cana e camindanan cu e zapatonan aki a cana, pa continuá riba e sendero cu el'a cruza cu sigur lo conducí nos na un mihor comprendemento di su siñanzanan.

Amigonan, laga Watty su intencionnan guía nos, cu e recuerdo di su sonrisa animá nos, cu e forza di su discurso inspira nos pa sigui lucha. Laga



Edwin Abath

nos conservá su ehempel y siñanzanan pa medio di nos comportacion y trato di un pa otro. Y cu cada logro y victoria alcanzá, corda su palabranan: Cubista firme riba mi proposito "mi sa unda mi ta bai, pero nunca lo mi lubidá di unda mi a bin".

Pesey tambe ruman Watty, awe n'e sitio aki, na unda e eco di bo discursonan glorioso lo

keda pa semper, mi ta bisabo danki Watty. Danki pa bo guía, danki pa bo generosidad, danki p'e abrazonan franco, danki p'e candor di bo sonrisa, danki p'e consuelo den momentonan difícil, danki pa bo amistad sincero, danki pa bo sostén incondicional, danki pa a haci nos tur orguyoso di ta Arubiano y especialmente di ta jiu di Playa Pabao."